

Epesus

Agau e nugau zebigeg

Yesus go Mesgai wag simai darena, wai 32 mazicina, Pol go Rom ban uzan hiacaranemen zau oug daimai, Epesus uzanan duail el sikut wai mareun. Tikikus morona, agau go oimai, betei duail el maraba, nanalamam. Duail el asiu Epesus uzan daremen go ecesab asiu wabun dabilanemen, gonun, agau go oug Pol nug aneun, “Ecesab em e ebu dareu mui, Mesgai wag dareu mui, go Yesus nug unum gumaneu. Uwait nugau dabeleu enai Yesus gonugau salau eim Zuda duail el mui, emgasag ipal ebuan duail el mui, unum go tutak tularai meun darem. Goagal igul eg go Yesus nug unum zilagai mareun.

Kristen duail el ag animag tutak sul, Kristus go agal gagaliag sul. Ag zau sul, Yesus nug go ulacan zau sanag sul, duail el go zau gal sul. Yesus go agal gamulag, ag gonugau air sul.” Agau go oug, ig Yesus nug gonugau duail el ein ece maramau ig abiu mamam.

Agau e sesamorabun ze

1:1-2 Pol nug gonugau ze bigegweun.

1:3-3:21 Yesus nug Zuda duail el mui, emgasag ipal ebuan duail el mui, tutak tularaimai, gonugau duail el pet tapai mareun.

4:1-6:9 Duail el ag Kristus dual pezai daimai, go awau dabun abu sesamoramamen.

6:10-20 Ig Yesus nugau malai duail el, gonun, ig Satan dual iwai mamam.

6:21-24 Pol nug Epesus duail el ‘Kero’ awaraimai, gonugau ze poeun.

Pol nug Epesus uzanan Kristen duail el sikut wai mareun.

1 ¹O zaiar, iz Pol, Uwait nug iz Yesus Kristus nugau ze oi aidabun du tapai mileun. Ag Epesus uzanan duail el agal oiagab Yesus Kristus en petak emen, ag sikut e wai marem. ²Igual Memenig, Uwait, igual Dubanou Ban, Yesus Kristus goagen goagal oiagab naliu eiman go isanaraba, agal oiagab selai dabun maramau.

Kristus nug en, Uwait nug igual doropig naliu dabun gusig migeun.

³Uwait, go igual Dubanou Ban, Yesus Kristus nugau memeg mui, gonugau Uwait, ig gonugau wanib ulagwag murab. Ig Kristus nug dual

pezai dacanem, gonun, Uwait nug igual doropig naliu dabun gonugau gusig Mesgai wagan unum migeun. ⁴⁻⁵Uwait go em e mui, Mesgai mui usalai i meun ebu, gonug ig Yesus dual pezigei maimai, gonugau duailel pet dabun tapai migeun. Gonun, ig gonugau ameg ebu naliupet pet daimai, ze mui i damam. Getal Uwait nug ig en ougab nug noumaimai, Yesus Kristus nugau salau ebu ig gonugau gelegul alegul pet tapai migeun. Gonugau dabeleu eim, gonugau ougab selanau eiman igul go guzeneun. ⁶Ig unum Uwait nug gonugau ougab naliu eiman ig isanigeun en gonugau wanib ulagwag murab. Uwait nug gonugau nag Yesus Kristus nug en ougab noumaimai, ig gaul isanigeun.

⁷Uwait nug gonugau ougab naliu eiman ig subantal isanigeun, gonun, Kristus go ig en a gegeulanau ebu noumaimai, ig koli gau migeimai, gonugau eseu sil igual igul eg zilagai migeun. ⁸Uwait nug go dabeleu banou mui, go igual igul unum abiu. Go igul naliu koli koli ig ebligeb miganeun. ⁹Uwait nug getal Kristus palautabun dabeleun, go gonugau dabeleu getal wageimai dareun ulis, ig en ougab siksikai mui abai migeun. ¹⁰Uwait nugau dabeleu banou go, aiu ses ziwas tub gonug tapai meun go ebu, (gonugau dabeleu unum betei iborina), ece unum Mesgai ebuan mui, em e ebuan gotuligaba, gumigabun du banou tutak nugau pigsal damam. Go Kristus.

¹¹Ig Kristus dual pezai dacanem, gonun, Uwait nug gonugau duailel pet dabun tapai migabun dabeleun. Uwait nug ein igul guzenabun dabilaneu, go dabeleu go petak sesamoraneu, gonun, ulis go ig gonugau duailel pet tapai migeun. ¹²Go ig, Israel duailel, amegai igual oigeb Kristus en petak aimai, gonugau gusig banou ulagwag murabun guzeneun. ¹³Ag, emgasag ipal ebuan duailel, han petak ze go Uwait nug ag igul eg ebuan imareun domenin. Ag Ze Naliupet go doimai, sesamoremenin, gonun, ag Kristus nug dual pezai daremen. Ag Yesus Kristus en agal oiagab petak ebi, Uwait nug ag gonugau Ah Wes marabun baib meun ag mareun. ¹⁴Uwait nug Ah Wes migeun. Ah Wes go igual oigeb oug dareu, gonun, ig abiu Uwait gonug ein ece gonugau duailel marabun baib meun petak aiu ses maramau. Igul go eiman ig petak abai migeu, Uwait nug ig gonugau duailel pet tapai migeun, gonun, ig du tub nugau salau duailel sul i damam. Igul go en, ig Uwait nugau wanib banou ulagwag murab.

Pol nug Epesus uzanan duailel en Uwait aureun.

¹⁵⁻¹⁶Uwait nug ag igul go en guzenarena, duailel ipal agen agal oiagab Yesus Kristus en petak aimai, Uwait nugau duailel ipal en oiagab nug noumaneu en ailemen doimai, iz ag igul go guzenemen en oiab siksikina, Uwait umkoskos ag en 'Ese-e' auraimai, i utanem. Iz Uwait auranem ziwas go ebu, ag en dabui i sikanem. ¹⁷Igual Dubanou Ban, Yesus Kristus nugau Uwait, igual memenig go wanib ulag banou mui, gonugau Awau Wes maraba, go

nug ag ece suban abai maraba, ag Uwait suban abiu mabun aimai auranem. ¹⁸Iz Uwait nug gonugau al gusig agal oiagab oug maraba, ag ein ece naliu wabun gumei daremen abiu mabun Uwait auranem. Gonug ig gonugau duaillel naliupet pet dabun baib migeun. ¹⁹Iz ag gonugau gusig banou eim gusig ipal unum zilareu abiu mabun Uwait auranem. Ig igual oigeb go en petak emun duaillel go gusig banou gonug ig isaniganeu. ²⁰Gusig gonugtal gonug Yesus noumeun koli asai moroimai, gonugau ebeb naliu eiman Mesgai wag hobo moroun. ²¹Gonun, Kristus go du banou pet Mesgai wag daimai, gonug em e gumanemen dudu banban mui, tibur inain mui, tibur eg inain mui, gusig unum ulis darem mui, aiu ses zumau mui, go nug unum zilarai dareu. ²²Uwait nug ece unum Kristus nugau arab piu gotularai maimai, Uwait nugau duaillel gumarabun du banou moroun. ²³Ig Kristen duaillel Kristus nugau enib sul. Kristus nug go igual gagalig sul, gonun, go nug ig gonugau salau mabun gusig miganeu. Gonugau gusig sil Mesgai wag mui em ebu mui salau unum poaneu. Salau tub nugtal zuab tam.

2 ¹Getal ag Uwait nugau kasai ze i sesamoranemen, ag igul eg macanemenin. Gonun, agal doropag noumemen sul daremen. ²Ziwas go ebu, ag em e ebuan duaillel igul eg sesamoranemen sul ag han igul eg go maimai, em ebuan wes eg ag taliarai katai darem. Agal gumaraneu du Satan nugau igul sesamoranemen. Uwait nugau Ze i sesamoranemen duaillel, ag wes eg gonugau gusig nug agal oiagab oug salau mai dareu. ³Ig unum getalan duaillel go dacanemen sul dacanemun. Ig igual enimig en siksikabun igul eg go sesamoranemun, einen, igual dabeleu duaillel ipal sul. Ig ereg ag abai em ebuan igul eg sesamoranemun, gonun, Uwait nug ig ibaig aigsisileun.

⁴⁻⁵Igual doropig noumeun, bo, Uwait nug ig en bisomig banou peigaimai, ig en ougab banou noumaimai, gonug ig Kristus dual koli awau asai migeun. Petak pet. Gonugau ougab naliu eiman ag koli igul eg ebuan imareun. ⁶Ig ag abai ereg Yesus Kristus dual pezai damun, gonug ig Kristus dual asai migeimai, go dual gonugau gumarabun biz ebu Mesgai wag hobo migeun. ⁷Yesus Kristus em ebu alaimai, ig isanigeun, einen, Uwait nug gonugau ougab naliu eiman ig isanigabun ein igul naliupet pet migabun duaillel unum aiu ses zumaun abai mareun. ⁸Ag agal oiagab Kristus en petak emen, gonun, Uwait nug gonugau ougab naliu eiman isanaraimai, agal igul eg ebuan koli imareun. Agen salau naliu tub eim gonug ag koli imarabun mab tam, tamacag, Uwait nugtal ag gaul isanareun. ⁹Agal gusig eiman gonug ag imarab tam, gonun, ag agal wanimag wag mabun iborain tam. ¹⁰Uwait nugtal igual patigai meun du. Ig Kristus dual pezai daremun, Uwait nug ig salau naliu mabun tapai migeun. Go getal salau naliu go mabun patet migeun.

Kristus nug duaillel unum gotuligeun.

¹¹Ag suban dabilan. Getal agal anaiagar ag emgasag ipal ebu soliagwemen. Guzenina, Israel dudu agen agal enimag galau

kuatanemen, gonun, ag Uwait nugau dudu anemen, bo, goagen ag dudu enimag galau kuatab tam, gonun, ag Uwait nugau dudu tam anem. (Bo, dudu go ag agtal agal ebeag sil igua Uwait nugau dudu abai marabun aimai agal enimag galau kuatanemen.) ¹² Ziwas go ebu, ag Kristus dual pezai dab tam, ag Israel duail el abai i gotulai dacanemen. Baib go Uwait nug gonugau duail el isanarabun mareun go ag emgasag ipal ebuan duail el isanarab tam. Ag em e ebu daimai, Uwait en i dabilanemen. Ag ein ece naliu aiu ses wabun ag i abiu. ¹³ Getal ag pulig dacanemen, bo, ulis ag Kristus dual pezai darena, gonugau eseu nug ag Uwait waugab imarai beteun.

¹⁴ Kristus nugtal igual oigeb iau selai dabun go bigeg. Gonugtal Israel duail el mui, emgasag ipal ebuan duail el mui, tutak gotuligeun. Ag beu beu tam. Getal Israel duail el emgasag ipal ebuan duail el abai iwai macanemen igul gonug gil an sul begeh memenin. Yesus nug gil an go waipeun. ¹⁵ Yesus a gegeulanau ebu noumaimai, gonug Israel duail el agal kasai ze mui agal gusig ze mui unum oi heun. Go guzeneun, einen, du ug aliag go ag ug tutak alai gotulaimai, go dual pezai daimai, oiagab selai mui dabun guzeneun. ¹⁶ Gonug a gegeulanau ebu noumaimai, dudu ug aliag go getal iwai dacanemen tutak gotularaimai, Uwait waugab imarai aleun. ¹⁷ Guzenaimai, go alaimai, oiagab selai dabun ze ag emgasag ipal ebuan duail el mui Israel duail el mui ze go abai mareun. ¹⁸ Kristus nugau salau ebu Ah Wes tutak nug ig unum gotuligena, igual memenig waugab siabun iboin.

Ig Kristen duail el ig Uwait nugau zau pet.

¹⁹ Guzenaimai, ag, emgasag ipal ebuan duail el, ag ulis tubwagan duail el tam. Ag ulis Uwait nugau duail el ipal abai gotulaimai, Uwait nugau gelegul alegul darenen. ²⁰ Ag zau tub Uwait nug meun sul. Gonug Yesus nugau ze oi aidabun dudu mui Uwait nugau ze doimai, awaranemen dudu mui zau go ebuan sanag sul tapai mareun. Yesus Kristus nugtal go ulacan zau sanag gusig pet dareu. Ag han zau go mui pezai darenen. ²¹ Yesus nug zau go suban gusig patena, Uwait nugau Nou Zau banou usalaneu. ²² Ag emgasag ipal ebuan duail el Kristus en oiagab petak emen, Uwait gonugau Ah Wes nug ag han duail el ipal abai ereg imarena, ag Uwait nugau zau usalai darenen.

Pol nugau salau go emgasag ipal ebuan duail el Uwait nugau ze awarabun.

3 ¹ Uwait nug ag emgasag ipal ebuan duail el, Israel duail el abai gotulareun, gonun, iz Pol, Yesus Kristus nugau salau oi muranem, go emgasag ipal ebuan duail el isanarabun en iz hiacaranemen zau oug heilemen darem. ² Petak guzenai domenin, Uwait nug gonugau ougab

naliu eiman iz isanileimai, ag isanarabun tapai mileun. ³Uwait nug gonugau wagemoun dabeleu iz abai mileun abe maimai, amegai sikut ginampet wai maremin ag uligemenin. ⁴Sikut go wai maremin nanalai marena, domenin aba, ag izal Yesus Kristus nugau ze getal Uwait nug wageimai meun erunai abai mileun dabeleu abe mamamen. ⁵Getal gonug igual embigeg go wagemoun ze abai marab tam, bo, ulis Uwait nugau Ah Wes nug Yesus nugau ze oi aidanemen dudu mui Uwait nugau ze doimai, awaranemen dudu mui igul go araog abai mareun. ⁶Go wagemoun ze enai, Yesus nugau Ze Naliupet eiman ag emgasag ipal ebuan duailel, Israel duailel abai gotulaimai, ag Uwait nugau ece naliu ereg wanemen. Uwait nug duailel Yesus Kristus en oiagab petak emen ece go marabun baib meun, go ag ereg wabun daremen.

⁷Uwait nugtal iz Pol, ze naliu go duailel awarabun salau du tapai mileun. Go gonugau ougab naliu eiman iz gaul isanileimai, salau go mabun aimai gusig mileun. ⁸Iz duailel ameagab ebun du wanim banou tam. Duailel ipal unum agen iz zilacilanem. Bo, Uwait nug gonugau ougab naliu eiman iz isanileimai, salau go Kristus nugau ze naliupet emgasag ipal ebuan duailel abai marabun mileun. ⁹Uwait nug ece unum usalai maimai, amegai gonugau dabeleu ein igul guzenabun wageimai meun, go dabeleu getal wageimai dacaneun. Bo, ulis ze go Uwait ig imaigeun en duailel unum awarabun iz salau mileun. ¹⁰Uwait nugau dabeleu enai, getal igul go wageimai meun, bo, ulis gonugau duailel tapai mareun eiman gonugau dabeleu naliu araog meu, go eiman gonugau tibur mui wes naliu ipal Mesgai wag darem, Uwait nugau dabeleu naliu abe mamam. ¹¹Uwait nug getal tal salau go mabun dabeleu oi dareun, ulis Yesus Kristus, igual Dubanou Ban eiman igul go guzeneu. ¹²Yesus Kristus go Uwait waugab siabun abu im oiteun, gonun, ig ulis go en oigeb petak emun, Uwait nugau ameg ebun alabun i uminab. ¹³Guzenaimai, iz ag ulis awarem. Iz uhu banou go ag isanarabun omin en i dabileiban, oiagab eg i umau. Ag Yesus en agal oiagab petak emen i utan. Izal uhu gonug ag suban isanarabun zoi darem.

Pol nug Epesus uzanan duailel en Uwait aureun.

¹⁴Iz igul go memenig Mesgai wag dareu nug ig tutak gotulabun guzeneun en dabeleimai, iz gonugau wanib wag mabun taubib waimai, auranem. ¹⁵Go duailel em e ebun mui Mesgai wag darem unum agal memeag. ¹⁶Uwait nug Mesgai wagan ece naliu asiu goagal doropag isanarabun tapai mareun dareu. Gonun, gonug gonugau Ah Wes palautina, goagal oiagab gusig marena, ag agal doropag gusig wabun aimai Uwait auranem. ¹⁷Agal oiagab Yesus en petak aba, gonug agal oiagab oug dabun en auranem. Ag duailel ipal en agal oiagab noumebi, gonug agal oiagab oug gusig maraba, ag gusig tapai damamen. Igul go

sul, a ginib nug em nogoug gusig patai dacaneu sul dabun auranem.

¹⁸Gonun, ag, Uwait nugau duail el ipal abai ereg, Yesus Kristus nugau ougab nug noumaneu igul go banou pet, ag abe mabun iboin. Igul banou pet go, ag unum taliarai katai darem. Ag igul go ebuan uminai unabun iborain tam. ¹⁹Gonun, petak pet, ag Yesus Kristus nug duail el ag en ougab noumaneu igul abe mamamen, (bo, gonugau igul unum abe mabun iborain tam.) Gonun, ag gonugau igul abiu maimai, iz Uwait gonugau igul naliu agal oiagab oug mabun auranem.

²⁰Uwait nugau gusig nugtal igual oigeb oug gusig macaneu, gusig gonug igual dabeleu zilacoroi dareu. Igul unum Uwait nug guzenabun en auranem, go gonugau gusig igual dabeleu zilacoroi dareu. ²¹Gonun, Kristen duail el ag Yesus Kristus dual pezai daremen, ag ulis daremen mui, aiu ses zumam mui, ag unum umkoskos Uwait nugau wanib ulagwag moron. Petak.

Ig Kristen duail el Kristus dual pezai darem.

4 ¹O Zaiar, iz Pol, iza Kristus nugau salau macanemin, gonun, hiacaranem zau oug heilemen darem. Gonun, iz go igul naliu maimai, Uwait nug ein igul mabun ulareun en sesamorabun gusig awarem. ²Ag agal wanimag wag i macan, ag duail el ipal bisomagar a suban isanaran. Duail el ipal agen ag uhu marebi, ag aiag sisilai pigai i zumau. Ag duail el ipal agen oiagab nug noumaba, isanaran. ³Ag unum Ah Wes dual pezai daimai, oiagab tutak selai dabun salau gusig macan. ⁴Ig unum enimig tutak sul. Uwait nugau Ah Wes tutak. Ig unum ece naliu wabun tutak gumei darem. Uwait nug ig ecesab go wabun uligeun. ⁵Igual Dubanou Ban tutak dareu. Abu tutak eiman ig Yesus en oigeb petak ab, ig unum du tutak nugau wanib ebu ze gagalig patanem. ⁶Uwait tutak dareu, ig duail el unum go igual memenig. Ig duail el unum go igual Banou, go duail el unum gonugau salau mabun gusig migena, igual oigeb oug dacaneu.

⁷Bo, ig tutak tutak Kristus nug gonugau dabeleu eim gusig beu beu migena, ig wanem. ⁸Uwait nugau ze nug getal aneun,

“Gonug gonugau iwai zaugul zilacaraimai, wag siabun imarai sieun.

Gonug gonugau duail el ece naliu mareun.”

Buk Song 68:18

⁹⁻¹⁰Go ‘wag sieun’ bigeg enai: amegai go Mesgai wageiman em e ebu aleun, Du go em e ebu aleun, gonun, go koli wag sieun. Go Mesgai wag simai, du banou pet usaleun, gonun, go eru ebu aidabun iboin. Mesgai wag ta, em e ebu ta, aidabun go iboin. ¹¹Go nugtal duail el tutak tutak gusig mareun. Ipal gonugau ze oi aidabun dudu tapai mareun, ipal gonugau ze doimai, awarabun dudu tapai mareun, ipal gonugau ze duail el awarabun tapai mareun, ipal gonugau duail el gumarabun (*pastor*) tapai mareun, ipal gonugau ze abai marabun dudu tapai mareun.

¹²Kristus nug ig Uwait nugau duailel gonugau salau murabun gusig naliu go migeun. Gonun, Kristen duailel gusig usalabun gonugau salau naliu muramamen. ¹³Guzenaimai, ig unum oigeb Yesus en petak aimai, igual dabeleu tutak mui Uwait nugau Nag dual tutak alai gotulaimai, gonugau igul suban abe mab. Gonun, ig mogoi ginaginam sul i dab, ig dudu banban usalaimai, igual igul naliupet Kristus nugau sul usalamau.

¹⁴Gonun, ig mogoi ginaginam agal dabeleu sul i wab. Polu ze macanemen dudu ipal agal polu ze doimai, i sesamorab. Dudu go ig amecig pataimai, abu eg ebu heigabun salau macanem. Ig mogoi ginaginam wol nug puiganeu sul nug puigena, agal polu ze beu beu sesamoranim. ¹⁵Go naliu tam. Ig igual zaiger ag en oigeb nug noumaimai, petak ze maimai, ig unum Kristus, igual gumiganeu du nug sul usalamam. ¹⁶Ig duailel beu beu, bo, Kristus nug ig unum gumiganeu. Guzenaimai, go ig ibaig unum pezigena, ig enimig tutak sul usalanem. Ig igua igua oigeb nug noumaimai, igua igua isa isaniganem, gonun, ig unum igual salau suban maimai, ig ereg naliu usalamam.

Kristen duailel ag Kristus nugau igul naliu sesamoran.

¹⁷Gonun, iz ze tub awaramoroi, Dubanou Ban nugau wanib ebu iz ag gusig awaramoroi, ag getal Umus ougan duailel sul dabeleu eg mui daremenin. Ulis ag koli agal dabeleu ata atai i sesamoran. ¹⁸Agal dabeleu go umut ougan dabeleu sul. Ag dabeleu naliu tamacag, agal oiagab gusig im gebei dareun sul. Guzenemen dudu go ag Uwait nugau muzmuz awau dabun gusig i umamen. ¹⁹Ag ein igul eg macanemen en aipag i nuaneu. Ag igul eg go mabun oiagab asina, igul eg beu beu macanemen. Ag umkoskos guzenanemen.

²⁰Dudu agen Yesus nugau ze guzeneneg abu eiman, go abai marabun tam. ²¹Iz abiu ag Yesus nugau ze doimai, ag gonugau sesamoranemen duailel usalina, dudu ipal agen Yesus nugau petak ze ag suban abai maremen. ²²⁻²³Getal ag igul eg mai aidanemen. Go agal oiagab asaimai, agtal polumaimai, igul eg guzenanemenin. Igul go eiman ag abu eg ebu hiacareun. Bo, ag ulis igul eg go uteiban, igul naliu guzenabun dabilan. Agal dabeleu oiagab mui awau usalan. ²⁴Agal oiagab oug ag duailel awau sul usalan. Duailel awau go ag Uwait nug sul usalamamen. Agal igul naliu tuguai pet damamen.

²⁵Gonun, ag unum polumanemen igul uteiban, Kristen duailel ipal ibalagab petak ze awaran, *Zekaria 8:16* einen, ig unum enimig tutak sul darem.

²⁶Ag aiag sisilaba, ziwag go ebu igul eg i macan.

Buk Song 4:4

Ag aiag sisilaba, go aiag sisileun ziwag ebutal oiagab selai dabun tutak macan. ²⁷Ag Satan utebi, agal oiagab oug im i oitai simau. ²⁸Du in go getal zob waneun du, na koli zob i onen. Ein ecesab wabun nait

eben siltal salau onen. Go ebun na ecesab asiu wanem, ipal duailel esab tamacag go isanarabun iboin.

²⁹Ag agal oiagsau suban gumeiban, ze eg i macan. Ze naliu duailel ipal oiagab gusig marabun tutak macan. Guzenaimai, ag ze naliu go doimai, gonug ag isanaramau. ³⁰Ag igul ipal Ah Wes nugau ougab eg usalabun i macan. Einen, Uwait nug ag koli imarabun tapai mareun abai marabun Ah Wes agal oiagab oug meun. ³¹Ag duailel ipal en oiagab eg i wamau. Ag duailel ipal en i nebian. Ag aiag sisil i amau. Ag abai i ze alalan. Ag agal wanimag ebun polu ze i macan. Ag unum igul eg duailel ipal ibalagab macanemen go utan. ³²Bo, ag agal oiagab iau selai mui duailel ipal isanaraiban, bisomagar peiban, agen igul eg ag ibalagab memen zilagai maran. Ag Kristus dual pezai dabi, Uwait nug agal igul eg zilagai maraneu sul, agen han zaiagar agal igul eg zilagai maran.

5 ¹Ag go Uwait nugau gelegul alegul, go ag en ougab nug noumaneu, gonun, ag gonugau igul naliu unum sesamoran. ²Kristus nug ig en ougab nug noumaimai, ig isanigabun a gegeulanau ebun noumeun. Go gonugau enib Uwait moroun. Go Uwait nugau ameg ebun sous naliupet. Gonug guzeneun, gonun, naicigag igua igua en oigeb noumab.

³Bo, ag Uwait nugau gelegul alegul pet, gonun, ag ula ebun du tub nug wal igul eg i mamau. Ag igul eg ipal agal enimag siksikabun i macan. Ag duailel ipal agal ecesab en oiagab i alamau. ⁴Ag ze eg i macan, ag ir maimai, ze eg i macan. Ag agal dabeleu eiman polu ze ipal i macan. Kristen duailel ag igul go i sesamoran. Tam, ag Uwait nugau igul naliu ag isanareun dabileiban, go 'Ese-e' en auranemen. ⁵Ag suban abiu mabun iboin, duailel ag wal igul macanemen, ag igul eg agal enimag en siksikabun sag macanemen, ag duailel ipal agal ecesab en oiagab nug alaneu, duailel go ag polu tibur ulagwag macanemen duailel sul. Duailel go ag Uwait Kristus dual agen gumanem uzan go i simamen.

⁶Dudu ipal agen ag amiag patabun gaul ze mebi, ag petak aiban i sesamoran. Dudu go ag igul eg guzenabun aimai keuarai unabun guzenanemen. Uwait dudu go gonugau ze i sesamoranemen en aigsisilaneu. ⁷Gonun, ag igul eg macanemen dudu go i pezaran.

⁸Getal ag umut oug daremenin, bo, ulis ag Dubanou Ban nug al ebun mareun. Guzenaimai, ag al hilanau ebun dacanemen dudu sul aidan. ⁹Al hilanau go ag ibalagab dareu gonug ag igul naliu sesamorabun mui petak ze mabun unum abai maraneu. ¹⁰Gonun, ag ein igul naliu nug Uwait nugau ougab siksikanau abiu mabun dabilan.

¹¹Ag igul eg macanemen dudu i pezaran. Agal igul eg go umus ougan igul. Bo, agen go dudu agal igul eg i abai maran. ¹²(Einen, duailel agal igul eg wage wageimai, guzenanemen en ze mabun go ag aipag numau.)

¹³Bo, ein ece umut oug wageimai dacaneu, al nug araog maraneu.

¹⁴Gonun, al gonug ein ece wageimai dareu unum araog mina, ece go

han al sul usalamau. Igul go en getal Uwait nugau ze nug eneun, “Na duair ulis gabuai darem, na asen. Na ob oug eiman asemen, Kristus nug gonugau al na ebizab ilabun mizamau.”

¹⁵Ag subantal aidan. Ag dabeleu tamacag aidanemen dudu sul i dacan. Ag dabeleu naliu mui aidanemen dudu sul dacan. ¹⁶Ulis, ag duail el ipal igul eg asiu macanemen uligaranemen, bo, igul naliu mabun abu daba, ag abu go sesamoran. ¹⁷Gonun, ag suban dabileiban, Uwait nugau dabeleu abe mabun itanan.

¹⁸Ag wain ze asiu i zan, einen, ag ze gusig asiu zaimai, ag kar wagaba, igul eg asiu mamamen Bo, ag Uwait nugau Ah Wes aurebi, gonug ag gumaramau. ¹⁹Ag zaiagar abai aidamamen ziwas ebu, umkoskos agal oiagsau nug mui oiagab ougeim mui Uwait ulagwag moroiban, Buk Song nugau ze mui Uwait ulagwag murabun kabal mui waiban, Dubanou Ban nugau wanib ulagwag mabun guzenan. ²⁰Ag umkoskos Yesus Kristus nugau wanib pataiban, memenig Uwait ece unum miganeu en ‘Ese-e’ en auran.

Pol nug duail el egaremen en awareun.

²¹Ag Kristus nugau wanib ulagwag macanemen, gonun, zaiagar agal ze suban sesamoran.

²²Ag ailel du mui, ag Dubanou Ban nugau ze suban sesamoranemen sul agal gamulagar agal ze han suban sesamoran. ²³Einen, Kristus go Kristen duail el gumaraneu sul, du nug wau gumaneu. Duail el go Kristus nugau enib sul, Kristus nug agal igul eg ebuan imareun. ²⁴Kristen duail el ag Kristus nugau pigsal darem sul, ag ailel han umkoskos agal gamulagar agal piagsal dacan.

²⁵Ag dudu, agal walagar en oiagab noumamau. Kristus nug gonugau duail el en ougab noumimai, isanarabun noumeun sul, agen han agal walagar en oiagab nug noumamau. ²⁶Ze mui, Uwait nugau ze nug mui, Kristus nug gonugau duail el ze ziwareun. Igul go eiman duail el gonugau pet usalemen. ²⁷Gonugau duail el gonugau ameg ebu naliu usalabun aimai guzeneun. Guzenina, duail el ag e unupag mui, suiag mui, esab eg ipal enimag ebu i damam. Ag unum igul naliu mimai, ze tub agal wanimag ebu i daba, ag nug sul naliu damamen. ²⁸Guzenaital, ag dudu, go agal enimag en oiagab nug noumanemen sul, go agal walagar en oiagab nug noumamamen. Du in go gonugau wau en ougab nug noumeu, go en ougab noumane. ²⁹Ig abiu, du tub nug gonugau enib iwai i muraneu, tam pet tam, go subantal gumaneu, Kristus nug gonugau duail el gumaraneu sul gumaneu. ³⁰Kristus ig subantal gumiganeu, einen, ig unum gonugau enib sul. ³¹Uwait nugau ze nug eneun,

“Igul go en, du go gonugau memeg anag dual utaraimai, wau dual pezai damau, ag tutak sul usalamam.”

Stat 2:24

³²Wageimai dareun ze go bigeg banou dareu. Izal dabeleu ze go Kristus gonugau duailen ag enimag tutak sul en ze macaneu. ³³Bo, ze e han ag dudu tutak tutak ag agal walagar en oiagab nug noumabun en aimai ze macaneu. Ag agal enimag en oiagab nug noumaneu sul agal walagar en guzentel guzenan. Ailel han agal gamulagar goagal piagsal daiban, igul naliu go ibalagab guzenamamen.

Pol nug mogoi ainagul mui, goagal memeagar anaiagar en mui ze meun.

6 ¹Go geleagar aleagar, go agal memeagar anaiagar go agal ze sesamoran. Ag igul go guzenamamen, go naliu. ²Einen, Uwait nugau ze nug eneu, “Na memen anan goagal ze suban doiba, goagal ze sesamoren.” Go kasai ze go amegain baib mui dareu. ³Baib go guzenai aneu, “Na igul go guzenemen, ein salau unum mamam naliu usalaba, em e ebu ziwis huia damam.” Lo 5:16

⁴Ag dudu mogoi ainagul mui, ag agal geleagar aleagar aiag sisilabun gusig ze i awaran. Bo, agen agal geleagar aleagar subantal gumaraiban, Dubanou Ban nugau ze sesamorabun abai maran.

**Pol nug salau duailen mui, goagal gumaranemen
dudu mui, goagal ze meun.**

⁵Ag salau duailen (*slev*), Kristus nugau ze oiagab siksikai mui oiagab tutak maimai, uminai mui sesamoranem sul, ag agal em ebuhan gumaranemen dudu goagal piagsal daiban, goagal ze sesamoran. ⁶Agal gumaraneu dudu piarai dabi, go salau duailen naliu wanimag wag marabun salau tutak i macan. Bo, agal dabeleu eiman, ig Kristus nugau salau duailen (*slev*) ebi, Uwait nug ein salau mabun aneun dabileiban, salau gusig macan. ⁷Oiagab selai mui salau macan. Agal dabeleu ig dudu agal salau mai darem aimai, i ze macan, ig Dubanou Ban nugau salau mai darem an. ⁸Ag go don, ag salau duailen (*slev*) ta, duailen agal salau agtal gumaranemen ta, ein salau naliu macanemen, Uwait nug ag tutak tutak unum ag ece naliu maramau, go petak ag abe macanemen.

⁹Ag salau duailen gumaranemen dudu, ag han agal salau duailen (*slev*) suban gumaraiban, igul naliu maran. Ag eg marabun ze i awaran. Ag go don, ag mui agal salau duailen mui, agal gumarabun du tutak Mesgai wag dareu. Go ag gumaranemen dudu agal Dubanou Ban mui, salau duailen agal Dubanou Ban mui ereg gonug duailen agal igul sisiramau. Gonug na du banou, na salau duair aimai i atelizeimai, sisiramau, igual igul memun, go igul tutak eim sag sisicigamau.

Ig Kristen duailen ig malai dudu sul tapai dab.

¹⁰Ulis izal ze poaimoroi, awarem. Ag Dubanou Ban dual pezaiban. Gonugau gusig banou eiman ag gusig tapai dacan. ¹¹Ig Satan nug

ameig pataneu, gonun, malai dudu agen malai mabun aimai, agal malai macanemen ecesab maimai, malai macanemen sul, ag han Uwait nug malai mabun ece mareun maiban, gusig tapai dacan. ¹²Ig em e ebuun dudu abai malai mab tam. Ig Satan nugau wes eg ipal wag aidanemen mui, wes eg ipal gusig mui em e ebu darem mui, wes eg ipal go umut empip gumanemen abai malai maporoi. ¹³Gonun, ulis Uwait nug ein ece malai mabun mareun unum arugan. Guzenaimai, ziwas eg go zumau ziwas ebu, ag wes eg abai alalaimai, gusig tapai damamen.

¹⁴Gonun, iz ag awarem, ag gusig tapai dacan. Uwait nugau petak ze go agal let us tugaiban, igul naliu go agal toronag ebu enimig galau a tatau sul macan. ¹⁵Ag duail el ipal Uwait gonugau Ze Naliupet oiagab selai mui dabun awaranem, go agal aramag galau sul macan. ¹⁶Ag umkoskos agal oiagab Uwait en petak emen, go gali sul patai aidamamen. Satan nug malai hog ab al mui pasamau, gali gonug tapelabun iboin. ¹⁷Uwait nug koli imaigeun dabilanemen go *hat* sul gagaliag ebu kulai maiban, Uwait nugau Ze Ah Wes gonugau maulzag huia malai mabun mareun patan.

¹⁸Uwait nugau Ah Wes nug erunabun dabeleu maraba, umkoskos ag isanarabun Uwait auran. Igul go eiman ag gusig tapai daiban, oiagab petak emen i utan. Ag Uwait nugau duail el isanarabun umkoskos Uwait auran. ¹⁹Agen han Uwait iz isanilabun auauran. Guzenebi, Uwait nug iz ein ze marabun gusig milaba, gonugau Ze Naliupet wageimai dareu gusig mui duail el marabun, i uminai. ²⁰Iz Uwait nugau Ze duail el awarai aidarena, dudu ipal agen go en aiag sisilina, iz ulis hiacaranemen zau oug heilemen darem, gonun, agen Uwait aurebi, iz gusig milaba, duail el gonugau ze marabun i uminai.

Pocabun 'Kero' ze.

²¹O zaiar, Tikikus, go igual zaicig pet, go Dubanou Ban nugau salau naliu oi muraneu du, gonug iz e ebu erunai darem gonugau ogusau nug unum suban awaraba, dumamen. ²²Igul go en go ag waiagab ig unum e ebu erunai darem awarabun en palautem, betei awaraba, agal oiagab gusig damau.

²³Igul memenig, Uwait nug mui igual Dubanou Ban, Yesus Kristus goagen ag Kristen duail el unum agal oiagab selai maraba, agal oiagab petak abun gusig maraimai, duail el ipal ag en oiagab nug noumabun gusig maramau. ²⁴Duail el go ag igual Dubanou Ban, Yesus Kristus en umkoskos oiagab nug noumanem duail el, ag Uwait nug gonugau ougab naliu eiman isanaramau.